



UNIVERSITÄTS-
BIBLIOTHEK
PADERBORN

Universitätsbibliothek Paderborn

**Illustrissimi Domini Simonis De Fierlant, Hispaniarum Ac
Indiarum Catholico Regi, In Hispania Ac Belgio, A Concilio
Status, Brabantiae Cancellarii, Catholico Ab Affectu
Tractatus, Quo, Clarissime ...**

Fierlant, Simon de

Coloniae Agrippinae

§. 6. Ad Historiam præcedentem brevis Appendix seu Racematoriae
pseudo-Synodi Lovaniensis de hoc Libro Iudicium.

urn:nbn:de:hbz:466:1-37059

*AD HISTORIAM PRÆCEDEN-
tem brevis Appendix seu Racematoria pseudo-
Synodi Lovaniensis de hoc Libro Judicium.*

NE iniquus videar libri Gabriëliani historicus, postquam corras undequaue quæ infelici homini ruborem adspargere poterant, justum est, ut ea non reticeam, quæ in aliqualem ejus commendationem facere possunt. Proinde nolui hic deesse officio meo, & non omnes haud veri modo, sed & fidelis historici partes præclare sustinere; idque adeo ut agam, nolim certè humiles de trivio laudes, & plebeia vulgi testimonia recensere; nam ea quidem & plura sunt, nec certo satis autore sparsa, & ob clamores, ut fit, nimium confusa, quam ut fideliter singula enumerentur: neque est profecto, cur iis diligentius evolvendis, & tempore, & lectorum oculis abutar; quando illustre sanè habeo & magnificum libri hujus præconium, & ejusmodi, ut reliqua quidem, quæ de libro superbe jactitata sunt omnia, & autoritate longè, & splendore superet. Audiamus:

Famosa illa & toto Belgio notissima Synodus Racematoria Lovanii anno 1675. adversus Eruditiss. D. Nicolaum du Bois per plures hebdomadas Congregata, at nec legitime, nec in Spiritu sancto, sessione & hebdomade secunda
inter

inter alia ita de Gabriëliano fœtu, qui RECENTER eo ipso anno NATUS adhuc in cunis jacebat, ita Synodali supercilio definivit; *Vin' scire, ubi moralem Christianam non somniavit, sed certissimam hauserit P. Gabriëlis? replico in crebra JESU CHRISTI Evangelii meditatione.* Quid illustrius ad laudem, quid dici sanctius potest?

D. Bonaventura, Thomæ Aquinati familiariter, & curiosè, ut fit, de libris inquirenti, unde cælestem illam rerum divinarum scientiam haussisset, renidenti vultu, en tibi, dixit meum, mi THOMA, librum, protensâque manu piam CHRISTI servatoris è cruce pendentis imaginem ostendit. Quid ipse THOMAS? divinum scilicet è sacro Christi ipsius ore hoc descriptis suis judicium audire meruit *benè scripsisti de me Thoma; veniat nobis hos inter sanctos medius P. Gabriëlis, & tertium de ipso legant posteri exemplum, ut qui moralem suam Christianam certissimam hauserit in crebra JESU CHRISTI Evangelii meditatione.*

Mirari herculè satis nequeo, quid fuerit, cur, cum suum Romæ librum recuderet, & omnia caute corraderet, quæ ad ejus commendationem videri poterant peropportuna, Synodale hoc Decretum majusculis impressum literis ipsa libri in fronte primis lectorum oculis non objecerit; atqui si id fecisset sperare utique feliciter causæ suæ patrocinium licuisset, & certè poterat sui S. P. Francisci meminisse, de quo ita legimus, cum religionis à se Deo auspice institutæ confirmationem apud Sedem Apostolicam urgeret

repugnantibus è sacro Cardinalium cœtu non paucis, unus demum inventus est, qui causam piè susciperet, & quo demum usus argumento? videte, inquit, ne Sacrum JESU CHRISTI Evangelium impugnetis, impugnabitur autem, si hanc ex eo depromptam, haustamquè regulam rejiciatis. Dixerat, & hoc uno causam feliciter confecit.

O te rerum tuarum incurium nimis Ægidi; una hac decretoria Lovaniensium Racematorum definitione rem conficere totam potuisti ne hâc una te Toletanis Romanisque Censuris subducere? hanc unam tot in te evibrandis fulminibus sic quasi laurum objicere? Videte etiam atque etiam, & pro rei gravitate serio attendite, ne S. JESU CHRISTI Evangelium sacrilegè impugnetis, è quo tamquam sanctissimo fonte purissimi instar ac lympidissimi rivuli exclamas Moralis mea Christiana effluxit. Hoc unum Toleti tu, hoc Romæ si aut dixisses ipse, aut dici curasses, quemquam è Patribus profligatum adeo, ac perditum futurum fuisse credas, qui Sacrum JESU CHRISTI non reveritus Evangelium, Moralem tuam non dico proscribere, sed hircere contra fuisset ausus, aut confuso etiam murmure obmutire. Obsecro enim, cui vel sola Sacrosancti Evangelii mentio, si Christianus sit quidem, non occludat os? at scio, quid ages? prævertere telum neglexisti, emissum jam, si potes, excuties, ut facilius ita ipsi vulneri medearis, si prius telum extraxeris; atque ita tu tecum, aut, si mavis, cum carissimo ingenii tui fætu jam ter fulminato: Pupugit te suis scrupulis

ET INFELIX CONCORDIA. 39

lis molestus iste Cornelius; at mulserunt Racematores, castigavit illustrissimus Cancellarius, at blandiente lingua lamberunt vulnera Racematores: Roma ut errorum ream proscribit: at proscriptam ambabus ulnis Racematores excipiunt: Toletum Bajanismi & Jansenismi condemnat, at Racematores absolvunt: Roma iterum æternis addicit tenebris, at Sanctis Evangelii Jesu CHRISTI radiis te Racematores illustrant: ipse denique Pontifex Maximus hortator contra te, ac jussor Romanam Congregationem Mandato Apostolico in tuam perniciem armat, at suos habet Patres conscriptos, quos in tui defensionem conjuratos illustri isti tui præconio jussit subscribi ipse conciliabuli Racematorii magni nominis Præses: At heus! quin tu Præsidentem illum aperte nominas? latere, scio, vult; imo, quæ ejus est humilitas, Eximius ipse cum, sit sub tribus literis S. T. B. hoc est Sacræ Theologiæ Baccalaureo delitescere; at nescis hoc humilitati deberi, ut latere ipsa cum velit, latere tamen non permittatur: tuque adeò nomen expedi, ut virum & istius Synodi Præsidentem suspiciamus, quem cum ipso Sanctissimo Domino conferre videbaris; quod quamquam vel ipso auditu horrendum est, non alienum tamen ab iis, qui, nequidquam toties fulminante ex arce Vaticana Romanæ Ecclesiæ Sede Apostolica, damnatis Baji Jansenique placitis mordicus ita adhuc & tam aperte adhærent. Quid enim hoc nisi ipsis Pontificibus Bajum, nefas! Janseniumque præferre? Tu autem quid hæres aut dubius animi pendes? dic, sodes, die

dic apertè esse *Ex. D. Gummarum Huyghens*, in cujus gratiam congregatam Synodum scimus, quam quidem nos Racematoriam, alii calumniatoriam vocant, nomine paululum honestiore, quam quo antiqua illa Ephesina latrocinialis dicta est.

Pæniteat interim ac pudeat, tam Racematorii cœtus præsidem quàm reliquos sub hoc præside convocatos Patres, sui de libro Gabriëliano editi Judicii, & vel ex hoc uno videant Romano quam careant cerebro. Ego felicem sortem æstimo *D. Nicolai du Bois*, eique congratulor, quod gravibus calumniis dicto à cœtu vel pseudo-Synodo imperitus sit interim dum, suis cum operibus, probis Eruditisque à Viris, summo in pretio ac honore habetur, Theologus & Canonista certè inter præcipuos: contra quam *P. Gabriëlis*, qui mea Brabantia Cancellarii operâ scriptoque Sanctæ Sedi oblatum, ab eadem damnatus est; in tantum ut ejus cum doctrina liber omnium ex oculis & manibus eliminatus sit. Quare non video cur *D. du Bois* Apologiis ulterioribus tempus ac chartam terat, dum Romana in *Patrem Gabriëlis* Censura pro omni illi Apologia est. Obtrecent Racematorii Patres: non potest non esse honesta calumnia, ubi tam probrosa est laus. Ab improbis laudari probis summum improprium est, uti è contra ab illis vilipendi, maximum honoris encomium. Idque Romani Philosophi est Judicium, dum dixit: *displicere malis laudari est.*